

勝思惟梵天所問經論卷上

弗八

元魏天竺三藏法師菩提留支譯

歸命釋迦牟尼佛四句之義於諸經首有論
解釋如彼應知於大衆中說此法門者示現
法勝大衆攝在說法住處依彼山等勝處說
故六萬四千比丘僧者示現莊嚴如來大衆
故此經法門快妙甚深出過一切聲聞境界
示現如來能說勝義故七萬二千諸菩薩者
何故菩薩多於聲聞以此經典爲諸菩薩摩
訶薩說甚深法故

皆是智者之所識知者何故重說依世間法
故世間說言勝中勝者如言於端正中最端
正者乃可將來於有德中有勝德者乃可將
來彼諸菩薩各別有智非共有故復更有義
皆是智者之所識知者入地菩薩之所知故
此明何義以諸菩薩摩訶薩先行菩薩行者
知彼菩薩故以是故言皆是智者之所識知
彼諸菩薩智者所知有七種德皆依樂說辯
才應知何等爲七一者種種樂說辯才二者
無滯樂說辯才三者堅固樂說辯才四者了

了樂說辯才五者不怯弱樂說辯才六者相應樂說辯才七者任放樂說辯才此諸辯才如經得具足陀羅尼乃至得無生法忍如是七句次第而說此義應知應云何知陀羅尼者以多聞慧樂說種種諸法門故故名種種樂說辯才速疾不住故名無滯樂說辯才以得攝受諸三昧故無有忘失故名堅固樂說辯才以諸菩薩摩訶薩等依勝通力之所住持不畏一切諸魔等故故名了了樂說辯才菩薩攝得四無所畏威德快妙於自他衆無

所怖畏故名不怯弱樂說辯才依於假名他力成就三法體相而不顛倒故名相應樂說辯才得八地中無生法忍任意說法離說法障故名任放樂說辯才

聖者文殊師利諸菩薩等以何義故名法王子以初發心來常斷婬欲法故初發心者已入菩薩定心正位應如是知

一切菩薩皆是大賢士何故唯說聖者跋陀婆羅等名爲大賢士以爲示現心行勝故彼跋陀婆羅等菩薩有如是心我所教化衆生

皆化令得阿耨多羅三藐三菩提心既如是復化衆生令得阿耨多羅三藐三菩提是故自利利他行勝如實修行自求菩提亦化衆生令得菩提是故說彼跋陀婆羅等名為大賢士

有百千萬大衆圍遶者示現如來大眷屬故一切皆是得心定者此以如來能領大衆於大衆中最為勝故以百千萬衆示現大事是故圍也所言遶者示現大衆皆悉善伏諸煩惱故言說法者示現如來常說諸法而不斷

絕離諸過故

右膝著地者示現欲問威儀相故復為示現諸大衆等一心之相故雙膝著地者不成禮拜相亦不成問相以諸世間右膝著地敬重相故

動此三千大千世界者以諸魔等與說法者而作留難為令諸魔生驚怖故又為說法時大衆不起散亂心故又為可化衆生若放逸者令覺知故又為令衆生念法相故又復有義動此三千大千世界諸衆生等令

其觀察此諸大衆說法處故又爲教化純淑
衆生令得解脫故又爲令隨順問正義故
佛言網明恣汝所問我當解說悅可爾心者
如來聽問示現自身我是一切智人爲令聽
者聞如來說法生尊重心故

能見佛身者隨觀如來何等身分不能捨離
更觀餘分以如來身相微妙故超百千萬日
月光明者示現勝相快妙相相應故示現如
來出世間相以如來身有如是相故如來爲
與衆生安隱與衆生樂示現正直心相應知

修行智果相應應知應云何知應知如來依
彼色相放諸光明能作衆生二種利益謂與
衆生安隱及樂與智相應照諸佛土我自惟
念若有衆生能見佛身及思惟者此中見者
初觀色相也言思惟者次後觀察也說諸光
明依三種法差別應知三者所謂一因二名
三成辦所言因者即彼與樂與安隱智相應
修行此義應知名者如經名寂莊嚴乃至名
曰示現一切種色如是等也依自各各作業
差別此義應知言成辦者所成辦事略有四

種依彼義故略說則有四種光明所謂受用
增長功德止惡令信言受用者諸佛如來可
化衆生共受法樂故彼受用樂謂見如來供
養如來禮拜如來問如來應知見如來供養
如來者依第一光明得見如來思惟如來也
見如來供養如來者第一光明說禮拜如來
者示現身業供養見如來者非供養應知問
如來者第二光明說於所問中以有世間及
出世間果報差別次第復有六種光明世間
果報勝妙差別依二種地一非定地二依定

地非定地中以願攝取二種果報一者轉輪
聖王勝妙果報二者天帝釋王勝妙果報依
定地者謂梵天王勝妙果報何故不取夜摩
天等諸果報者以世間諸經皆不說故佛放
光明亦應照彼而諸經中無是故不明言出
世間果報差別者謂依三乘三種差別此義
應知增長功德者所謂增長三種功德一者
惡道衆生令出彼處於未來世生善道中二
者受苦衆生即現身中與彼安樂令得歡喜
三者能令放逸衆生生於善法言止惡者謂

令衆生離諸趣故離諸地故離諸難故離諸障故名爲止惡諸趣二種一者惡道二者善道惡道三種令諸衆生離諸難者謂令衆生離三惡道種種苦難令諸衆生離諸障者謂令衆生離善道中諸根不具盲聾惡業心見迷惑種種諸障離諸地中種種諸障諸地有三一菩薩地二聲聞地三凡夫地菩薩地中謂令衆生遠離六種諸波羅蜜所對治障聲聞地中謂令衆生離三種障不恭敬障及無智障增上煩惱不能禁止而起煩惱故名爲

障又不恭敬者謂不信障又無智者無多聞慧障又增上煩惱不能禁止而起煩惱故名障者無慚愧障凡夫地中謂令衆生離四障依本修集貪瞋癡等煩惱現行障謂邪念等現行故一切煩惱現行障謂離煩惱現行故此是止惡依二十一光明次第說應知言令信者見如來身種種光明微妙殊勝是故生信希望欲見故種種異色者見種種色也見者希望欲見也又種種異色者青黃赤白等各各差別也無量種色者青等各各有無

量種也過百千萬色者餘青等色中過勝光明也過者謂青黃等中復過無量無邊也若餘殘劫者過於一劫乃至無量無邊劫說也光明功德無量無邊不可窮盡者光明功德無量無邊筭數譬喻所不能及乃至無餘涅槃界不盡應知一切光明乃至阿僧祇阿僧祇光不出受用等四種光明相應如是知如來示現無量無邊身光莊嚴不可思議方便善巧相應說法者示現說者所說今可化衆生生尊重心故示現希有令生勝因敬重心

故世尊我未聞此諸光明名者示現如來無量無邊光明功德所不說者不讚歎者若如是者今何故說示現無上功德因故是以次言世尊如我解佛所說法義世尊若有衆生得聞如此諸光明名能生淨信恭敬心者彼諸衆生畢竟定得如來如是光明之身也先放光明網明菩薩已知一切如來所作利益衆生業受種種法樂欲共無量餘諸菩薩同受法樂故請如來令放光明如經世尊唯願今日放請菩薩光覺諸菩薩故此光不出前

四種中受法樂光令餘世界菩薩覺知者此
光入前分散光明亦入增長功德光明應如
是知以何等光明照於無量無邊世界此中
示現過於可數故名無量去到何方猶如虛
空邊不可得故名無邊

言現住者更餘世界彼處不去故名現住不
入涅槃故名現命以無諸病故名現在復說
諸法清淨相應是故名爲無病應知

奉見彼佛者以現見釋迦牟尼佛故供養彼
佛者一切所應供養之具盡以給施故問彼

佛者如法諮請故答彼佛者如法對故深細
意問者斷諸疑網故

又復有義現見面故供養佛故依本行威儀
故聽問以不故如是次第依法依義問法問
義故

自此已下依問答義應如是知十種清淨堅
固心略依二種心說一依不染心說二依恭
敬心說

依不染心者依深淨世界七種差別深離深
法應知

七種差別者所謂法差別以淨法不淨法差別故受差別以受苦受樂差別故業差別以下中上姓家生差別故以惡行善行雜行差別故心差別以諸衆生於佛法中信法不信法差別故行差別以正行邪行差別故心修行差別以三乘願行差別故道差別以善道惡道差別故如是等惡心等染此對治無染相故說八種清淨堅固心此義應知應云何知法差別染者此有二種一者依義謂善說相不善說相如是分別二者依法謂聞善相

聞不善相如是分別

對治者初句以不瞋恨心對治瞋恨心謂於善語於不善語不起心故於惡語中不生心念言我能忍此義應知第二句言等以慈心者以諸文字性如是故以說非顛倒法令諸衆生住安隱處故

受差別染對治者所有諸受皆悉是苦如是一切事中等生悲心憐愍衆生故

業差別染對治者謂正修行如是一切處心皆平等與樂修行智故

心差別染對治者於供養輕毀離高下心故
行差別染對治者不見諸過故不生利益心
故心修行差別染對治者等一味故以彼此
三乘不相是非故

道差別染對治者不生驚怖隨順自業如是

善知以觀察法體故是名八種清淨堅固心

依於七種不染心說應如是知

依恭敬心者此有二種一者於一切菩薩生
世尊想故此明何義謂於此界生五濁中諸
菩薩所生如來想故如是佛國土中見諸菩

薩行於苦行求大菩提不生疲倦畢竟如實
修行於是菩薩生如來想以是故言生世尊
想復生希有想此義應知應云何知如佛出
世難甚為希有菩薩摩訶薩亦復如是以不
捨離發菩提心亦名希有是故於彼生世尊
想二者於佛生希有想故此有何義如無染
世界生彼衆生無量百千萬劫壽命諸佛如
來常作無量衆生利益如是多煩惱過世界
中生於少時間能作無量衆生利益此中見
佛生希有想此義應知清淨堅固心能增長

成就此義應知

入寂靜行依清淨堅固心與菩薩念菩薩受
取於彼世界百千萬劫不離正念常修梵行
娑婆世界從旦至中堅持禁戒不染心行示
現勝故此明何義如治重病爲令速差但與
第八妙藥令服則愈如是衆生多煩惱過爲速滅
九故令得勝法對治則滅此義應知示現生在
惡國衆生多有諸苦多有煩惱汙染世界故
爲令諸餘菩薩見世尊釋迦牟尼佛禮拜供
養問答如來故聖者勝思惟梵天以爲上首

爲問問答依勝思惟梵天生於大衆恭敬心
故示現勝思惟梵天畢竟得何等樂說辯才
得何等樂說辯才果依此二種說正問中爲
最第一此義應如初說得何等樂說辯才以
一切處問記相應故以巧能令衆生解故以
言語最勝故以尊重言語故以說正因故以
依實義說故以依安隱說故是名美妙以有
人情故以於大天人邊得清淨心供養故以
一切諸魔怨敵不能降伏故以說深密意義
故以此八句說勝思惟梵天美妙言語樂說

辯才此義應知應云何知所謂一者相應二者令解三者尊重四者安隱五者人情六者大清淨至到七者不可降伏八者甚深

次說樂說辯才因示現如是多種功德言語說法時若諸衆生有不如實修正行者而不

捨彼諸衆生故以與勝樂善相應故以求衆生離於諸苦得勝樂故以與樂等勝功德時歡喜慶彼故以求不染等與勝樂安隱心故以此五句說勝思惟梵天彼美妙言語樂說辯才因此義應知應云何知示現三種心一

者不捨心二者與樂心三者安隱心如是一三一次第說應知次說得何等樂說辯才果所謂為彼一切衆生於一切義中能斷疑故偈義如經

爾時世尊讚勝思惟梵天言善哉善哉梵天復善哉梵天者以其發問儀式詣佛於此三時中事相應故應知善哉梵天汝今至心諦聽我為汝說者如是次第不顛倒心正念心故其心堅固而不疲倦者是正直心此中大菩提信心為本是作願相依彼願故則能具

足得如來地一切功德依菩提心堅固方便
有第一問於大乘中略有四種疲倦之事依
彼四種疲倦事故菩薩雖發菩提之心作菩
提願而失彼心何等爲四一者以諸衆生不
如實修行故二者多作衆事故三者多時在
有中行故四者等解脫中心常欲得速解脫
故爲彼有力故此四種障對治法者謂於衆
生起大悲心等如是四種法次第而說此義
應知應云何知謂諸菩薩依大悲心如是如
是見諸衆生不能如實修正行時如是如是

轉轉增上生憐愍心爲彼衆生令得解脫如
是如是轉轉增上增長作願又諸菩薩常勤
精進而不疲倦所作多事而悉能作又諸菩
薩無始世來過去諸苦信解如夢不計後時
未來世苦又諸菩薩爲一切智雖同二乘解
脫煩惱雖取無量不共功德爲彼有力斷彼
欲得速解脫心言無等者不共功德無有等
故所言等者二乘少分斷煩惱等是故名等
以是義故名無等等如是四種不疲倦心對
治四種疲倦心障是故菩薩於大乘中其心

堅固而不疲倦

如是其心堅固而不疲倦依於自身佛法純
淑如實修行正說法已次依爲他如實修行
略說四法所言決定而不中悔者於二種義
一者無義二者有義言無義者以無我故彼
無我者離於法故言無法者無彼相故是菩
薩畢竟說言諸法無我諸菩薩等如是畢竟
說一切法悉皆無有我言有義者有三種義
一有過義二功德義三者二義以差別故有
過義者謂一切生處以攝一切諸煩惱故不

願彼處故不樂說是故菩薩畢竟說彼一切
生處無有樂者諸菩薩等如是畢竟說諸生
處無有樂者功德義者謂讚大乘無上之法
以諸功德一切相應故是故菩薩畢竟決定
常讚大乘諸菩薩等如是畢竟常讚大乘言
二義者彼過功德二法不空故是故菩薩畢
竟說彼二法不空諸菩薩等如是畢竟說彼
罪福二法不空此明何義雖無量時得因緣
相應能與果報故

如是依自利他利如實修行畢竟說法已次

說增長諸善根依世間果報出世間果報因
善根增長說依出世間果報因善根增長說
世間果報因有二種一者自妙身成就因二
者資生成就因自妙身成就因有二種一者
不定地中自妙身成就因謂戒善根增長二
者定地中自妙身成就因謂智善根增長彼
上地下地智功德過以依智根本離欲得彼
故資生成就因者捨一切物謂布施因善根
增長出世間果報因者謂解脫因是出家相
說離貪著因以因彼故得解脫因一切功德

善根增長又增長者此諸善根依世辯說有
五種增上義故名增長何等為五一者降伏
諸善根增上故名增長以此善根勝出聲聞
辟支佛等諸善根故二者不違增上故名增
長以不退故以堅固故三者不畏增上故名
增長以依此善根過地獄等惡道怖畏故四
者不偏增上故名增長以能等破所治法故
五者無差別增上故名增長以作自利他利
無異相故

如是增長諸善根已於不信佛法不如實修

行衆生不生恨心於讀誦等善行分中如法而說無所恐懼威儀不轉是故次第說彼法相謂於不信佛法不如實修行衆生無所恐懼威儀不轉彼有三種謂軟中上軟者爲命常畏自身不得資生中者有二一者常畏毀辱二者常畏惡名現前說惡屏處說惡上者第八常畏苦惱於身中受十三

如是無所恐懼威儀不轉隨順白法是故次說增長諸白法依四種白法說一者欲白法二者行白法三者滿足功德白法四者證白

法欲白法者謂諸菩薩以大菩提教化衆生彼欲心令諸衆生於未來世諸白法中得自體相欲行白法者謂諸菩薩捨已資生珍寶等物以用布施不求未來自身果報滿足功德白法者謂諸菩薩依彼捨珍寶因得好妙法成就心不貪著而復修行白法攝取妙法以多聞相應故一切白法熏習滿足是故菩薩諸功德滿足證白法者謂諸菩薩摩訶薩依彼證智爲於自身大菩提故說智方便得彼白法證智勝法

如是增長諸白法已隨順善知從一地至一地是故次下說彼法相謂依四種法說何等爲四一者滿足功德二者清淨諸障三者成就心四者具足修行集諸善根者爲得從地至地功德滿足故離諸過者爲清淨彼一切諸過故迴向方便者離有資生及離小乘速解脫心故所有善根一切迴向取大菩提故勤精進者至心修行一切時中常不斷絕以依根本取勝處故如是說方便已次說方便法相善知方便教

化衆生者依四種法說一者能教化衆生二者集無量智功德三者集無量智慧四者方便能攝取衆生者謂依布施愛語等隨順諸衆生攝取諸衆生是故菩薩能教化衆生集無量智功德者雖離定不定地而依布施等行於三世中一切衆生一切種功德悉皆隨喜是故菩薩得無量智功德集無量智慧者雖無智障對治而常修行發露懺悔是故菩薩集無量智慧方便者依一切菩薩修行對治勸請諸佛依爲諸衆生與智慧光明集諸

智慧以善方便為根本故是故菩薩得無量智慧如是已說修行方便次說為彼說法之相隨順諸眾生者為之說法故謂依四種諸眾生說一者依中間眾生二者依入法眾生三者依謗法眾生四者依所尊重眾生隨順彼眾生威儀方便故依中間眾生者謂依未信佛法眾生菩薩修行隨彼眾生所信佛法而為說之與彼眾生安隱事門不但與彼供養恭敬虛妄誑之菩薩行如是依入法眾生者謂菩薩心為令眾生得入法義故供給之

令彼眾生貪著利養親近菩薩得入法義於如是法有未度者令得度故為求衣食資生之具不生疲倦不為自身貪著已樂菩薩行如是依謗法眾生者菩薩自行無諸過失依柔和忍辱不計彼罪教令懺悔菩薩行如是依所尊重眾生者菩薩於彼屈伏順從隨語而受菩薩行如是如是已說隨順眾生如實修行而不疲倦為之說法已次說不失菩提之心以為不失菩提之心隨順說法故見佛妙果以為最勝依四種法說一者依不奪他

物二者依定因三者依緣力四者依因力常
憶念佛者心常憶念佛菩提心果故以見佛
果成就無量不共功德此依不奪他物是故
不失菩提之心所作善根不離菩提心者一
切善根皆菩提心以爲根本依菩提心無量
世中長遠因故依彼定因世間種種受果報
處所不能牽此依定因吹之而去是故不失
菩提之心親近善知識者以正修行依外緣
力善知識等此依緣力是故不失菩提之心
讚歎大乘者爲諸衆生發菩提心讚歎大乘

生生世世爲於自身增長一切善根種子爲
因力大因力堅固此依因力是故不失菩提
之心

如是不失菩提心故畢竟一心行菩薩行是
故次第說彼法相能一其心而不散亂者以
對四種散亂心障故說四種不散亂心何等
四種散亂心障一者乘障二者教化衆生障
三者聚集佛法滿足功德障四者畢竟聚集
一切佛法障何等四種不散亂心云何對治
一者遠離聲聞心者對治乘障不墮聲聞小

乘心故是故菩薩於大乘中心不散亂二者
捨辟支佛心念者對治教化衆生障不著自
身三昧樂行故是故菩薩教化衆生心不散
亂三者求法無有厭足者對治聚集佛法滿
足功德障以求佛法無厭足故爲集一切諸
佛法故增長種種諸善根故滿足佛法諸功
德故是故菩薩聚集佛法滿足功德心不散
亂四者如所聞法廣爲人說者對治畢竟聚
集一切佛法障如所聞法如是如是正念觀
察以正覺知畢竟聚集一切佛法故是故菩

薩畢竟聚集一切佛法心不散亂是名四種
不散亂心對治四種散亂心障此義應知如
是畢竟得一心已善求於法是故次說善求
於法以對世間四種果報成就相似說出世
間四種果報成就應知示現菩薩求出世間
果報成就故求於法何等名爲世間四種果
報成就一者快妙端正成就二者無病成就
三者富貴成就四者不畏他人成就云何相
對治如世間人以爲成就自身端正作希有
因故求珍寶如是菩薩爲諸相好快妙成就

於善法因生於寶想生希有想故求諸法如
世間人爲無病故求妙藥草菩薩如是爲斷
一切諸煩惱病於佛法中生妙藥想故求諸
法如世間人爲富貴故求於財利菩薩如是
爲求諸通成就不退爲求義相令得不失於
佛法中生財利想故求諸法如世間人爲離
賊等成就不畏故求財寶菩薩如是爲離一
切諸障煩惱令彼不能降伏菩薩菩薩不畏
一切諸處菩薩不畏一切處者所謂世間一
切諸苦以爲欲過一切世間離諸世間一切

苦相得寂靜相爲得涅槃成就不畏於佛法
中生無苦想故求諸法復有異義依世間珍
寶四種功德相似相對說出世間法寶應知
何等名爲世間珍寶四種功德云何復名相
似相對一者最上大價貴重如世間人得彼
寶故則能出生無量財寶菩薩如是得出世
間佛法寶故能生出世無量善根二者最勝
法相應如世間人得彼寶故則能療治種種
諸病菩薩如是得出世間佛法寶故則能斷
除一切諸煩惱病如彼妙藥三者如意如世

永樂北藏

勝思惟梵天所問經論

第一〇二冊

間人得彼摩尼寶體依彼寶故如心所須求之皆得菩薩如是得出世間佛法寶故依法思惟一切善根功德具足四者寶體如世間人得彼摩尼寶故隨心所須求得無盡菩薩如是爲過世間一切諸苦得出世間佛法寶故得果無盡得爲衆生說不生不死寶

又復有義世間衆生得無量寶寶在手故則能隨意成就無量殊勝之事菩薩如是得出世間大乘法寶則能隨意成就一切世間及出世間一切功德殊勝果報如是得無量寶

治諸病等依初句釋餘句應知

如是求法隨順多聞有巧方便能離諸過是故次第說彼法相善出毀禁之罪者依如實觀不取不捨依不生滅不去不來依未來世不復作惡依能遠離一切所疑得無生忍者第八謂內心忍滅諸法忍如實觀察十八不取不捨故得無滅忍者如實觀察罪過之體虛妄分別不生不滅以不去不來故得因緣忍者觀察因緣本來不生以他體攝故如實觀察毀禁染體離生因故於未來世不復作惡得無住

忍者以異異心展轉生悔如實觀察諸罪根本即在身中不離於心不見彼罪過如是不見一切罪過遠離一切心中所疑能滅悔故善出過罪

如是諸過根本是虛妄染法若欲斷過要斷過本是故次說斷彼過本善斷諸煩惱者依三世說正觀察者如實正念依邪念行現起煩惱如實正觀不見彼體故遠離未來諸障增長諸白法者於未來世更不作惡以是至心不作惡故得清淨心得善法力者觀察虛

妄煩惱諸過不見過去一切煩惱以得白法力故獨處遠離者以得寂靜心種子故如是次第善根增上故隨順不生煩惱境界護諸煩惱故得因緣力故未來世中煩惱不起故如是折伏諸煩惱已善往諸大衆是故次第說彼法相善往諸大衆者有二種差別依人十八差別依心差別依人差別者往何等人何所爲往何義故往云何而往此明何義貴人出家有多聞慧爲求法故生貴重心往詣彼人不覓其過此人如是不覓彼人過失故往云

何往彼人者賤人出家有多聞慧爲求法故
生尊重心往詣彼人非憍慢心此人如是非
憍慢心往詣彼人阿蘭若人無多聞慧非輕
賤心求少善法往詣彼人不自顯故此人如
是不自顯故往詣彼人憤鬧處人無多聞慧
不爲欺彼不爲自身我是高勝何所爲往以
爲自身爲於他身求善根故往詣彼人不爲
自身供養恭敬名稱讚歎此人如是不爲自
身供養恭敬名稱讚歎故往彼人依心差別
者以依四種心成就故一者求法心成就以

見法勝猶如眞寶爲求彼法故往大眾二者
威儀心成就脫去金冠寶履傘等威儀柔軟
而往大眾三者求上上義善根心成就雖得
上法不以爲足更求上上勝中勝法爲與法
施故往大眾四者本願心成就不求自身供
養恭敬名稱讚歎爲自他利故往大眾
如是往諸大眾應行法施是故次第說彼法
相善開法施者以何法說以何義說依何事
說云何而說因彼事說故以何法說者以法
攝取法故如得聞慧如是說法以何義說者

以得義故自作誓願已畢竟故內自思惟爲
他人說依何事說者以作妙事作賢事故如
所說法如是作事以諸言語不虛妄故云何
而說者示現淨法故示現二諦法相次
第故如是爲他說法令生善根增長堅固自
身因力是故次第說彼法相得先因力不失
善根者依四種法說一者教化衆生二者能
忍諸苦三者遠離邪見四者修行一切功德
善根依止因力堅固說故於他闕失不見其
過者不見他過護自身過應衆生過故得化

衆生因力堅固生生世世常能教化一切衆
生因力增長現前堅固依止如是堅固因力
於未來世教化衆生堅固增長而得成就是
名菩薩得先因力不失善根於瞋怒人常修
慈心者樂修大慈以能忍彼瞋恨衆生作苦
惱事能忍諸苦因力堅固生生世世樂修大
慈常能忍彼故瞋恨衆生作苦惱事因力增
長現前堅固菩薩依彼依止如是堅固因力
於未來世能忍諸苦堅固增長而得成就是
名菩薩得先因力不失善根常說諸法因緣

者於諸法中爲他示現非顛倒因因力得果
爲離邪見樂正見事因力堅固生生世世於
諸法中爲他示現非顛倒因因力得果爲離
邪見樂正見事因力增長現前堅固菩薩依
彼堅固因力於未來世自身正見不樂邪見
堅固增長而得成就第八是名菩薩得先因力不
失善根常念菩提者不捨菩提心願力故常
不捨離菩提之心修行一切功德善根見大
菩薩心願力堅固生生世世常修一切功德
善根因力增長現前堅固菩薩依彼堅固因

力於未來世修行一切功德善根堅固增長
悉得成就是名具足得先因力不失善根
如是以有先因力故雖未有人說波羅蜜行
而有方便波羅蜜行是故次說不由他教而
能自行波羅蜜行法以施導人者謂於布施
波羅蜜中最爲上首初自修行後爲他人令
入修行菩薩如是修行布施故於未來施行
成就生生世世不由他教而能自行檀波羅
蜜故不說他人毀禁之罪者示現不見他人
過失故善住持戒菩薩如是善住持戒故於

才來不失一切諸禁戒行生生世世不由他教而能自行尸波羅蜜故善知攝法教化眾生者以爲教化諸眾生故爲諸眾生令得安隱忍彼眾生不修諸行動說諸法不生疲倦知心知使攝取眾生菩薩如是修行忍辱精進禪定故於未來忍辱精進禪定成就生生世世如是次第不由他教而能自行忍辱精進禪波羅蜜故解達深法者善知一切諸法無我菩薩如是信解深法故於未來智慧成就生生世世不由他教而能自行般若波羅

蜜故如是修行波羅蜜行得柔輒勝行能迴轉諸禪還生欲界是故次第說彼法相其心柔輒者謂諸菩薩以得三昧三摩跋提有自在力以巧方便而能轉起勝妙境界以彼菩薩於禪定中得自在力不爲禪定生於色界故得諸善根力者謂諸菩薩能勝處去而不取勝處雖生下地於彼禪定亦不退失故善修智慧方便力者謂諸菩薩以有方便般若力故善修諸行是故不退下地厭中不受彼地亦不修行生彼處行示現正因故不捨一

切諸衆生謂諸菩薩以不捨離諸衆生故捨
勝妙處取下處生示現教化諸衆生故

勝思惟梵天所問經論卷上

音釋

悌虛宜切輒軋切療力弔切憤憤古外切鬧鬧心亂切
也望也也鬧女教切也不靜也

勝思惟梵天所問經論卷中

弗九

元魏天竺三藏法師菩提留支譯

如是不著自樂爲與他樂示現與衆生樂以
得不退法輪地故是以次下說彼法相得不
退轉法輪地者以對三種所治退法故說四
種對治之法此義應知應云何知所謂修行
菩薩行中有三種法令菩薩退何等爲三一
者時節無量久遠以不能忍生等無量諸苦
惱故而生退心二者功德智慧少故而生退
心三者捨棄一切衆生無慈悲心故而生退

心堪受無量生死者所謂菩薩畢竟心取無
量久遠時節雖有無量生等諸苦堪能忍受
而不怖畏不生疲倦供養無量諸佛者所謂
菩薩供養恭敬無量諸佛如來從佛聞法獲
得無量功德智慧是故菩薩快妙功德智慧
成就修行無量大慈修行無量大悲者所謂
菩薩如是次第爲與一切衆生安隱爲與一
切諸衆生樂以不捨離諸衆生故如是以得
不退地故不斷佛種如實修行是故次第說
彼法相不斷佛種如實修行者爲得第一義

佛地故爲得世間佛地故第一義佛地者有三種因得一者根本欲心二者至心欲得三者上欲心不退本願者以不失根本欲是爲根本欲心如是示現根本欲心示現本願力相故如說修行者此有如來如法如說如是修行是名如說修行示現諸菩薩至心欲得故於諸善法大欲精進者是上欲心雖得少分不以爲足更求勝法故深心行於佛道者示現假名佛地因故假名佛者入涅槃時生佛示現言深心者示現求彼生佛心故行於

佛道者如實修行故生佛示現住持佛故又爲示現彼生佛時復有說法轉法輪等攝取衆生故爲受何等法義樂故佛放光明攝取聖者勝思惟梵天爲欲受彼種種法樂故聖者網明童子菩薩依彼先說問中勝故問彼種種勝說法相自此已下勝思惟梵天廣說應知彼問有八種邪問正問記爲說彼法如經梵天言網明若菩薩見我故問名爲邪問非爲正問爲如是等故何等八種一者依二者體三者依止四者依事五者過六者利益

七者起八者根本

所言依者謂依大乘以依彼乘此中正問故所言體者邪問爲體彼體有三種一者外道二者聲聞三者始發心菩薩

所言依止者有三種無智謂麤中微彼三種聞謂外道等次第應知應云何知外道之人依麤無智是故不識無我體相自他身中執著有我以不能知諸法相故依自心見所說邪論隨彼句義執著法相如是次第自身他身虛妄見問如是一切非正念問悉是邪問

聲聞分知無我法相復有不知是故名爲中無智聞依中無智取自業等造作諸業即因彼業受於果報不於餘處及著自體同相異相成就色等諸法必有彼如是問執著自身及他身法以有隨順斷煩惱障依於自乘名爲正念依斷煩惱障名爲邪念以不隨順斷智障故依於大乘名爲邪問始發心菩薩少分能知諸法無我復有不知有微無智依微無智依有無物離於有相取於無相於二法中一向取無法取無法相問是不正問

第九

三

依事者事有六種一者陰入界事二者因緣集事三者諦事四者證智事五者對對治事六者佛法事依陰入界事者依我我問故依因緣集事者依順問故依逆問故以生故問以滅故問以是處非處故問即彼因緣集問生滅即是是處非處如經中說身口等業修行諸善若生惡道無有是處依諦事者順因緣集逆因緣集順因緣集者染體二諦有因有果是有漏行法之體故逆因緣集者淨體二諦依道能滅是故道諦名為滅諦如是依

二二諦為染淨問依二種諦染法體故有生死世間問依二種諦淨法體故有寂滅涅槃問如是次第生於世間過於世間獲得涅槃如是世間涅槃二種差別依有餘涅槃無餘涅槃故如是問世間等事依實諦問此義應知以是義故依諦四種事遮法無我依證智事者依知依離問為得為修問如是次第彼智於見道時得智名以證智者自此已上得修道名以得彼證知依證智問得智名修行名此義應知以離彼集得出世間正道果故

以離諸使煩惱身故依離彼事問如經是故
網明以何處無得無取無證無分別無知無
依止無修無修見問是爲正問故此明何義
於真如中如所說字句說無如是智爲遮彼
處無如是法亦分別一一句分別之處亦遮
彼句一一之處無如是故無取者以不虛妄
分別我已得故無分別者以不虛妄分別我
已證故無依止者以不虛妄分別我已知涅
槃故不分別者是第一義依止者依止見道
見道爲修道依止說故無修見者不見我修

道故如是說法則名爲正依對對治事者所
謂善不善等法不善法名爲對善法名爲對
治又彼善法二種差別謂有漏無漏差別又
諸外道以邪見濁長夜有過此義應知無過
者亦有二種差別謂有爲無爲差別善法復
有二種差別謂世間出世間差別彼有分別
以無分別依彼所治治能治事問網明若菩
薩不見二不見不二者不見二數不見一數
以遮可取法無我故無明無相等行問名
爲正問者爲取彼法相遮彼能取可取相故

又無相無相平等行問者遮彼能說可說相
故又能說者說名平等可說名相以一切事
平等知故彼可說法亦名平等多種法相同
名說故依佛法事者依佛依法依修行依處
依可化衆生依進取證智如是次第佛等示
現第九因彼差別故問佛等種種應知佛種種者五
謂時家性命差別故法種種者謂修多羅祇
夜等差別故修行僧種種者謂一向菩薩聲
聞雜僧多少差別故國土種種者謂一向清
淨染雜國土差別故可化衆生種種者謂貪

瞋癡雜等差別故乘種種者謂聲聞乘等差
別故

所言過者諸外道等爲生法滅法是處非處
問見生法問見滅法問見染法問見淨法問
如是等問皆是染問是故名過聲聞之人如
是等一切問爲滅爲淨爲成涅槃而不得大
菩提是故名過始發菩提心菩薩亦不正念
問以不成就如實淨智是故名過
所言利益者若如是不問者即名利益此義
應知如是等問非正問等如是等問名正問

等示現彼義

所言起者即非正問及正問等示現彼義如經復次網明一切法正一切法邪故此以何義陰界入等皆悉攝在佛法中說如向所說陰界入等事相諸法如說不可思議名為正而起思議名為邪者是不正問及正問事如經梵天言網明以何義故諸法不可思議故一切法名為正若不可思議而思議者一切法名為邪故以何義故一切諸法不可思議如經一切法寂靜名為正思惟故以離虛妄

分別體故名為寂靜以離戲論故亦名寂靜以不信寂靜法無我故墮增上慢邊虛妄分別可分別法而修諸行以分別四大故起彼問法示現非正問法正性者離自境界離餘欲際是名法性此以示現正問因故此以何義以何等觀而能離欲以何等智知於彼法彼二不二名為真如此中如是無分別智真如智相名為實際言實際者謂離餘欲之勝際也言實際者離於諸欲謂無分別真如智相此謂內心自境界中如實觀察地觀相故

如是次第明爲法性寂靜應知地者自心境
界成就及觀真如是所觀地何等法上謂如
所說陰界等事彼陰等事離於真如以彼真
如無戲論故觀彼真如無分別智彼智寂靜
以彼真如離於能取可取處故如是說甚深
法知此正法甚深難解如經網明菩薩言梵
天少有衆生能解如是諸法正性故如此中
說諸法正性離正法性更求智者則不可得
以彼法性出過世間一異數故遮有法體所
言少者依一數故離彼一數更無少分如是

爲遮取有物體非彼法體一向是無不覺不
知遮無法相此明何義此中謂說信此三世
諸法根本不見法相非謂實證遮諸菩薩摩
訶薩等有實證法示現此義以隨順此義故
名爲信非證此法證者名爲不見一事網明
若有善男子善女人得聞如是諸法正性勤
行精進是名如實修行者依聞思慧於智慧
中說彼法相如向所說以依何心以依何意
故如來說法此義應知不戲一切法故是名
證法以如實知故是故彼人不住世間不住

涅槃以彼世間煩惱染中無一法捨是故不減以涅槃中無一法取是故不增示現諸菩薩摩訶薩不住世間涅槃相故如是聞說正法相者次第從他聞法然後內心自正思惟次第能生出世正見獲得彼果離於諸相示現實體不住相故示現不住涅槃因故此以如來見法無我等一味故示現菩薩世間涅槃諸過功德無有分別平等相故如是諸菩薩得不住世間不住涅槃故說法次第至此已竟復依異義次下更問此

明何義如來說法不能異過於者不能異過於身不能異過世間更有一法是故世間無一法減於涅槃中無一法增遮離一物遮得一物故此明何義非謂一向不過世間有過世間以是遮彼見無物故此明何義以爲示現過二相故此義云何言二相者一者世間行二者涅槃分別世間過分別功德過彼二種過菩薩摩訶薩畢竟遠離此義云何平等法中無染無淨以依離欲實際法性故如是說以彼實際一向不同生死世間以其常故

是故無有入涅槃者以是義故不染不淨如是次第不必說法默然而住亦得如法修行諸行若欲說者應當如彼梵天所說是故讚言善哉善哉法不可說而能說之是故如來重讚善哉我不得生死不得涅槃如是等者第九領先說義更無有法而可說也如來何故重說此法以五百比丘聞說此法生於驚怖如來為欲令彼比丘於此義中畢竟定故此以何義示現如來意亦如是非獨梵天如是衆生墮無物邊是故如來同梵天說空修梵行

者不解深意義虛妄分別故何者梵行謂受持戒如實修行而不毀犯故修行正道者修行四諦差別觀也諸禪者初禪等四禪也三昧者有覺有觀等種種行也三摩跋提者無色四定也彼諸比丘以見有法見無法故聞上說已謂如來說一向無物亦無如是修行梵行故生驚怖以彼比丘見有法故見無法故為斷比丘有見無見則於其人佛不出世等者彼人乃至涅槃以為有物故求得涅槃為對治此有物見故如經彼人乃至求決定

相故如是依無名相正說法已爲呵責彼驚怖比丘故以二喻此二種喻者令生二種念因謂生厭念因生歡喜念因因彼二因獲得涅槃是故呵責此以何義示現依彼求法見過逼惱心故起於厭觀初喻相似相對治示現利益觀故共樂身轉故生歡喜觀第二譬喻相似相對治法次明彼人雖行正相而是邪行相以起生相以起滅相以得涅槃相以證道相故向來說法諸比丘聞微損惡行自此已下爲令諸比丘入於法中是故網明謂

於梵天令入法者此中示現二種法相一者示現實體二者示現得果言實體者令信法故所言果者令離邪見得解脫故畢竟示現正見相故爲比丘身此間說法能生種子餘佛國土諸佛如來亦說此法明彼比丘以何處畏而無去處不能遠離所說法相以一切處不離於法以不可避示如是相令彼不去故說虛空以爲譬喻示現此義何處怖畏捨之而去終不遠離所怖畏處如畏空者不能過空有無空處而可求也依彼證法示現得

相

空無相無願者是眞如應知欲求涅槃行涅槃中而不得涅槃者涅槃是眞如清淨相故此以何義以彼眞如一切法中悉平等故名爲涅槃口中言說不可取故此明何義遮彼實體是可取故如是遠離有無物法能如實知諸法體相彼諸比丘如是見已心得解脫得心解脫已則得實法得實法已自說法相彼諸比丘先是凡夫次作學人次成羅漢以此義故於三時後依先不成而作是言世尊

我等今者非凡夫非學非無學非阿羅漢也不在世間者謂彼無餘涅槃界中永斷一切受生處故不在涅槃者有餘涅槃中取陰相未盡故如實示現有佛出世現覺知相

所言動者散亂心也第九謂我想者我見也發者

謂能起作行心相也戲者動等十三句分別心也如是因果或盡示現彼人有佛出世也聖者舍利弗依道依得依滅依證問諸比丘諸比丘應如是答如舍利弗說而諸比丘如是誑言我已得七不可作而作言語問答此爲

示現實答返答故此有二種一者所證答二者說答以有如是者所立記故同行諸比丘說法不能至到大生尊重心以彼比丘說彼法體生尊重心故住於福田能消供養者依福田地住於羅漢道堪受供養故大師世尊猶尚不能消諸供養何況我等能消供養者此明何義如實知法性本來清淨故以是故言大師世尊猶尚不能消諸供養何況我等此明何義離於法界更無有人受供養者故以彼法界本來清淨故此以何義以住福田

地者住羅漢地堪受供養以如實知清淨法界故以諸世間不知如來是勝福田是故說言大師世尊猶尚不能消諸供養也此明何義離於法界更無別有清淨法相以彼法界自性清淨故依受供養故問福田故次問應受供養福田之人何等是耶如經次言不為世法之所牽者故世尊如是依諸菩薩是世福田說受供養福田之相是故答言不為世法之所牽故此以何義以諸菩薩摩訶薩常在世間行世間法不為世法之所染汙雖有

弗九

十一

勝負得失毀譽稱譏苦樂世法等門皆不能
牽菩薩心體不得不失不毀不譽不稱不譏
不苦不樂其心堅固不隨如是八種世法於
如是等心堅不動貪欲瞋癡所不能牽如是
人者是受供養福田人也是名福田能受供
養是為清淨以是義故因福田人故問清淨
福田之相以諸菩薩雖復多受眷屬利養而
不起心攝取一法執著一法以是義故能消
供養是勝福田能消供養示現此義是故次
問能消供養無所取著者示現能受福田勝

相是故得彼二相功德福田之名以諸菩薩
為諸衆生不不安隱起菩提心為諸衆生修
行彼處諸功德故得彼功德供養恭敬福田
中勝示現此義是故次問清淨福田以彼不
壞菩提心故是能受供清淨福田以是菩薩
能作福田攝取衆生作善知識示現此義是
故次問善知識直心修行如是次第入於禪
定從禪定起與諸衆生安隱之樂不捨一切
諸衆生故示現菩薩勝善知識菩薩如是能
作善友依如來教自利利他修行諸行不失

師恩示現此義是故次問能報佛恩為得佛
菩提不斷佛種故心為利益他故於如來自
作所作勝報恩行以報恩者有諸功德供養
等行示現此義是故次問供養於佛以法身
實際自體不生於如來身能知不生實際證
相為求彼法必得不失於一切時供養如來
是故菩薩以勝供養供養諸佛以為供養諸
如來故親近諸佛示現此義是故次問親近
於佛謂諸菩薩寧捨身命終不捨於十地諸
行以為攝取十地行故不捨禁戒得如法體

親近諸佛及諸菩薩示現勝行故以近諸佛
及諸菩薩生尊重心供養恭敬示現此義是
故次問恭敬於佛以無差別一切諸根為一
切根修行諸行是故不生煩惱之心以能修
行善護諸根是故得彼尊重勝心菩薩如是
正修行已得大果報示現此義是故次問於
財富得出世間信等七種最勝法財示現於
此勝法大財而得上上勝欲心相已得斷除
障行諸欲離諸欲相受於法樂受飲食樂得
證如實法如實修行信戒慚愧聞捨慧等說

財物施如次第說又慚與愧二種法財此依
斷除煩惱熱法應如是知菩薩摩訶薩雖有
七種法財不生心念我足不足示現此義是
故次問於知足以爲攝取諸衆生故菩薩雖
求供養恭敬而心常求無上般若不以爲足
不生具足心名爲知足第九既知足已十三離於諸欲
示現此義是故次問於遠離菩薩雖於三界
中行而不求彼處以得寂靜勝上心故既獲
寂靜勝上心已遠離身心示現此義是故次
問無諸惡行菩薩雖復受用種種勝妙境界

而心不爲煩惱所染以得勝心護諸根故菩
薩既得護諸根已於一切處皆不怖畏不怖
畏故得受安樂示現此義是故次問於樂人
菩薩雖受供養恭敬而不貪著常不捨一切
衆生如實善知諸有爲行離諸煩惱故得勝
樂如是不著離諸煩惱得勝樂已則得不捨
受樂衆生如是則得到於彼岸示現此義是
故次問能到彼岸以諸菩薩示現諸趣六入
之身攝取一切六入衆生爲斷彼欲令得彼
岸故離貪欲心是故名爲能捨六入捨六入

故則得勝心得到彼岸菩薩如是得勝心故到彼岸故彼處正住示現此義是故次問住於彼岸以不分別世間涅槃道無分別智證無我法住於無住涅槃得無生法忍以是義故第八地中得同不同智是故名爲到於彼岸住於勝處菩薩如是住於彼岸滿足出世間諸波羅蜜示現此義是故次問云何增長諸波羅蜜以求一切智心故施等增長以爲施等展轉增長是故菩薩爲諸衆生說一切智心諸菩薩等爲令衆生發菩提心增長施

行是故菩薩先世已曾令諸衆生發菩提心修行布施菩薩如是自行布施教人行施餘者復施教化衆生令行布施彼諸菩薩亦令衆生發菩提心修行布施彼諸菩薩復令衆生發心行施如是展轉自心住施令他住施以是義故施彼波羅蜜展轉增長以常不捨菩提心故說持戒波羅蜜餘毀禁者令得持戒以不捨離菩提行心爲得大菩提故爲令住持戒故以見一切智心不退故說忍辱波羅蜜於菩提心中說菩薩名爲令餘處諸餘

衆生生忍心故忍一切罪忍一切惡思惟一切智心不得故說精進波羅蜜依精進波羅蜜不見彼岸不取苦行相是故不生疲倦之心以證一切智心寂靜故說禪波羅蜜法所謂心自性清淨不生不滅以知寂靜智以散亂心一切不行故不戲一切法故說般若波羅蜜以攝取無分別智故以爲示現餘波羅蜜善清淨故爲餘波羅蜜依一切智心說唯彼障行煩惱對治法故其惟如是見波羅蜜勝行無我爲佛法淳熟故爲教化衆生故依

於彼法次問無量於諸衆生不生有心而生慈心此明何義無異自身安隱心故不生異身他衆生想菩薩依彼不生法想行於悲心以見苦苦法不成就故以諸衆生著彼苦苦故生悲心菩薩依彼不生我想行於喜心依彼見自身相離於喜心見他資生具足成就起貪嫉意心不生喜菩薩不爾更無貪想隨喜於彼是故遠離所治嫉妬依離嫉妬行於喜心菩薩依彼不生彼我想行於捨心依見彼我想此對治故行於捨心第八地中無功

用行以得無分別智力故以得同不同智慧力故能遠離自他心相故於諸衆生與彼染因快方便故

如是依波羅蜜依於無量爲利自身亦利他身而修行者復依上上欲心依受法樂依斷煩惱爲如所說一切功德得增長故次問云何住於信等如彼次第能信無言之法住於信法信第一法甚深法無我已餘甚深法難信得信以不執著一切音聲住聞慧中如所聞法無有如是執著之心異求於法雖少聞

慧而能多作事故但聞一偈說多聞慧故以依內心相故有慚謂依他身自身不以法行以知過失離於彼處捨外入故愧行成就他人說法不如法行離彼過失以他人身是外入故嫉妬入說彼人如是捨於彼法名捨外入此義應知身口意業三種清淨遍一切處成就功德能受供養淨福田等乃至慚愧如是所說諸功德等對治所治身口意業善惡相應以是義故名爲清淨依彼至諸功德具足是故名爲遍行一切功德處也如是應知

又復有義遍至一切功德處者於彼所說一切功德法中住故

十偈之義一一如經

如是依世間法說能受供勝福田等諸功德已即依彼義如是次第梵天發問此義應知

卷九

十六

云何菩薩過世間法者以諸聲聞亦過世間是故如來示現勝法過諸聲聞出世間法是故說言出過世間法又復示現雖在世間行世間法而過世間又不為彼世法之所染著現行世間化衆生故如經如實善知世間

諸法故又為聚集諸衆生故現巧方便為彼衆生攝取令入世間法故知世間集諦知世間所去而依願智生於彼處不為世間集所生故取如是生示現世間成就世諦依世諦故為衆生說法令諸衆生出過世間故菩薩雖於世間中行而終不為世間所染得法無我住無住道以為教化一切衆生是故雖生於世間為彼攝取世間道故

三十五偈如經所說

依說世間法如來亦依自身世間法世間識

知境界以樂說辯才說入世間法相以如來法出過聲聞出世間法聲聞亦過世間境界如來過彼聲聞境界復說勝法說彼法者爲餘衆生過世間故示現如是出世間方便梵天言世間者我說五陰名爲世間者此中示現五取陰應知依世間說故貪著五陰者貪著愛故名爲世間集者以依彼愛世間聚集過去未來現在諸陰故滅者以未來世陰因盡故以更不種未來種子故名爲滅觀察五陰不見二法名爲世間滅道者求道不求道二

佛九

十七

一向不得聖道示現勝故此名何義世間對治非一向定若有對治則能厭苦若無對治則退彼法若有一法爲對治此法則不對治餘法若有一法爲對治下地則非上地對治聖道對治則不如是以一切時一切法對治故

如是依聲聞乘對治之義說世間等差別相已次依大乘對治法之義差別相說依於大乘差別相說法相者如經復次梵天如是等故所言五陰五陰者但有言說者於五陰中

見聞知等但是名字分別說故以依無始久
遠集來依分別體是故執著彼法菩薩觀察
若依如是名字分別是言語世間若如言語
名字分別貪著相者彼為邪見離隨順行名
世間集如彼世間寂滅之相如實觀察滅相
之體如實觀察所緣滅故名世間滅以何等
道不取彼見名世間滅道向說分別能治分
別示現無分別智如是等世間境界如來已
過如來已得大涅槃故攝取非過世間非離
世間道故如是依世間世間等說苦諦等已

依勝世諦次下復問如來所說四聖諦法者
以彼聖人虛妄分別苦等諸諦如來示現真
實聖諦則不如是此以何義諦有二種一者
相諦二者心諦以依如是二種諦故依相諦
者說苦諦等所有法相所有法體所有實體
依彼非聖諦聖諦無差別故說道聖諦依心
諦者說勝聖諦彼聖諦中知顛倒心不顛倒
心故此以何義又非聖者說苦諦者彼但受
苦不知苦諦說集諦者彼人但聞虛妄集法
不知集諦說滅諦者彼聞滅名墮於斷見不

非九

十八

知滅諦說道諦者彼人但聞業與煩惱有爲之法如是法但是有爲世間集故不知道諦如是分別苦諦等四諦若如是等皆有諦者生三惡道諸衆生等皆應有諦而彼無諦以爲示現如是義故如經梵天若彼苦是實聖諦者一切牛豬諸畜生等應有實諦何以故以彼皆受種種苦故以是義故苦非實諦如是等故以何義故諸畜生中唯說牛豬餘不說者以畜生中唯牛與豬最愚蒙故以諸世間皆知牛豬最爲鈍故如是非聖虛妄分別

謂以爲苦諦此義應知以世間人依於苦門虛妄執著以爲苦諦依於集門虛妄執著以爲集諦依於滅門欲離有漏法虛妄執著以爲滅諦依道對治門虛妄執著以爲道諦又苦集二諦無彼體相以彼自體不成就故以彼自體本來不生無和合故以依彼虛妄執著心對治故說知不生不和合故是故說名聖人聖諦諸有漏法亦一切時無如是體以彼法體無可離故以依彼虛妄執著心對治依真如清淨彼一切法本來寂滅故說不生

非九

十九

不滅是故說名聖人聖諦對治對治亦無彼體相以彼自體不成就故以彼道諦非對治諦故以依彼虛妄執著心對治依自性清淨心依平等觀可觀依淳熟智依觀察智依彼諸法一切諸法平等無二無修道故說不二法得道是故名爲聖人聖諦以說第一聖諦涅槃異名名爲道諦是故說名聖人聖諦以不誑故以不生故說爲聖諦又從無生乃至不二謂依涅槃所修之道依聖道諦一切法平等故說一切法不二說涅槃者以真如法

清淨得名以彼涅槃離於可取能取法故以依彼法而得名故如是如是次第又彼諦者因不正念名爲虛妄語非實聖諦又即彼諦因正念故名爲實語亦非實聖諦是故示現妄語實語皆不成就如經梵天實聖諦實聖諦者非妄語非實語故彼非正念取我相等示現應知如是諸句於一一法中生執著故以異異義相縛應知謂有一我我體是有以爲根本依根本我故有種種以我不斷是名衆生依命根住故名爲命數墮六道故名丈

夫如是等見自身是一虛妄執著取我相等
即依彼我虛妄分別常與無常墮於常見墮
於斷見見我是色我是無色如是種種虛妄
分別異異執著著我是一以是我物以虛妄
分別是故取相依彼我虛妄分別取無明等
生故虛妄分別而取我相即依彼我虛妄分
別取無明等滅虛妄分別取斷滅相如是生
滅依於我相次第成彼虛妄分別取世間相
取涅槃相取彼世間取涅槃者如前所說諸
取相等所謂取者希樂信等虛妄分別堅執

定取唯此是實餘者虛妄是名為著以彼諸
見不可遠離虛妄執著是名為觸不離彼觸
是名為取如是次第不取不觸不執著者是
名實語示現正念知如是依丈夫無我非妄
語非實語說法已次依法無我說苦等分別
離無分別智是故名誑以是誑故名為妄語
是故示現彼二乘諦虛妄不實分別三世一
切法故彼念虛妄是故示現無分別智此明
何義以憶過去一切法門分別現在一切諸
法念未來世一切法門以是義故離於正念

菩薩住彼無分別智中不戲一切法相觀法
無我得無住涅槃以不住世間涅槃中故得
平等見菩薩如是善知法已諸諦如說示現
不見成就諦故聖人諦者彼處無實語無妄
語以是義故示現彼義雖有正念不正念心
二種差別而彼聖諦猶不成就若住實相成
就諦者則一切時古今常爾恒如是住自此
已下示現彼義如經梵天言實者古今實故
此明何義彼法性法體示現勝法體聖法體
因世間涅槃無差別故是故名爲常聖諦也

依世間涅槃示現二而聖諦成就如是依真
如相聖諦示現不離世間聖諦示現不取涅
槃聖諦如是說法相諦證已而說音示現彼
人名爲實說彼人說聖諦名爲邪說自此已
下次說彼義示現彼人無增上戒學因是人
不能守護諸根示現少因故示現彼無增上
戒學無彼增上定學因示現彼無增上定學
無彼增上慧學因示現彼無增上慧學示是
生相是苦諦等執著虛妄法次第自配此義
應知

勝思惟梵天所問經論卷中

音釋

豬專於切
與猪同

永樂北藏

勝思惟梵天所問經論

第一〇二冊

永樂北藏

勝思惟梵天所問經論

第一〇二冊

勝思惟梵天所問經論卷下

第十

元魏天竺三藏法師菩提留支譯

如是彼婆伽婆以為世尊而彼聲聞但是外
道次下示現彼聲聞人成於外道以彼愚人
失物為諦說物為諦示現彼人墮於惡道故
以自不證以如來得無言語法故苦等諸諦
自體不成示現說諦相我如是證示現不立
有法相故示現他不取故菩提不可得以無
分別體故不取我已得菩提法無如是取離
一切有以離三界離五道故以過彼法得出

世間聖道法故如是不見一切諸法是菩提
相不證一法而證諸法是故說言應正遍知
若如來於法無所得者以何義故說如來坐
道場名為佛者此問如來遮有物得故如來
說言我不得物聞說法名世諦攝故分別相
故以是義故依無體相法無我義此依法無
我問彼法相彼法無我以一切法無體為體
遮有無二法示現何義示現彼法非有物可
證非無物可證以彼法離於二相是故說證
如是說已自下次說非謂一向不證實法以

見無法虛妄執著故如實善知自性不生以
依顛倒他體而生染等所謂分別體性常一
切時自性不生知真如我如是證法云何知
如常不知不覺而知言知識者此爲示現彼
真如相亦不分別以不見彼眞實法體以彼
法體一切言語不可得說是故示現彼證智
因不知不識不可見等法者於見聞覺識墮
四種語此諸句等上起問示現應知不可
取等如彼法體如是彼法不可以彼見等取
故此以何義以諸名字不可得故過心境界

故以無戲論事故相應法中不可相當故以
諸言語不能至到故相應法中不可相當故
不可問答故過六根故過名字故內身一切
皆不可說故無世間相故世間法不行故離
於所作以有爲法所不行故以無世間心意
意識分別相故出過世間以無彼體故過諸
戲論無可對事故
如是所說示現說法體無有一切諸分別已
示現彼法虛空相似應知彼法虛空相似有
二種相應知一者遮去以離有無戲論法故

以得諸佛不可思議畢竟法故二者無礙以大慈心第一忍苦所不可作而能作故以無言法依言說故以依彼法令諸衆生得入法故爲示何義所有衆生依於點慧我慢心故此義不能信此所說法相以爲示現彼諸衆生善根微薄故說彼法相此明何義明此法門一切世間之所難信故以世間意故於同法中常顛倒故此明何義世間人意念云我等應證實諦依三學法修行滿足我依彼法應得涅槃一向修善法以依彼法現受法樂

此善行次第依佛出世以爲根本次有說法次有如實修行次有伴侶衆僧如是此法實諦等如實而住以無戲論故以諸世間人不能信此義應知世尊譬如水中出火火中出水者爲示何義以爲示現煩惱如火以非寂靜體遠離彼體故菩提如水以其能滅煩惱火故以彼不信與信相違相應不相應法此義應知言煩惱者所謂一切愚癡凡夫如是執著戲論言有煩惱染我爲彼愚人遮煩惱體不成就故以觀察法不可得故以出世

第十

三

間智乃證得故以識不能分別知故以對治所治學修道故以不執著所治能治二相法故以得真如清淨法故以無有心取得法故能令彼障無勢力故以彼障法本性不生故如說法相若人能信諸法不生如所說者則得遠離一切邪見而得解脫以得遠離取不實相能治所治分別心故

自此已下依諸菩薩摩訶薩信法功德讚歎彼菩薩有七種功德此義應知何等爲七一者所作諸行滿足功德二者修行功德三者

入位功德四者以自在心生有功德五者善練功德六者能集佛法修行功德七者得果功德云何所作諸行滿足功德示現過去於諸佛所能作種種功德皆悉已辦故復有何義依二種義一依功德二依智慧以能供養恭敬給侍諸修行等如威儀故聞正法故如是次第菩薩如是滿足功德智慧行已次應修行入地諸行是故次說修行功德四句示現有諸功德智慧增上以飲食法食二種攝故以依善知識復修諸行能於義中能於法

中作巧方便隨順正法如實修行故以得上
妙善根力故依巧方便故妙有二種一者能
作所作妙二者深妙能信彼處以聞如是二
種大妙不驚不怖故以善護如來妙法藏故
以如說法一一隨順如實修行故以不自見
以不自觸法故

第十

四

菩薩如是如實修行自身畢竟入菩薩位是
故次說入位功德二十五句示現此義云何
名爲生如來家以是菩薩依佛家生得佛法
故以能捨於分於煩惱爾時攝取無分別智

故示現修行施等行故以斷所治破戒法故
此明何義以持戒故對於破戒能起破戒諸
煩惱滅是故持戒治彼所治以得對治惜身
命故以得對治懈怠心故以對欲界惡不善
故以對一切諸不正見乃至對於小乘見故
如是名爲入位功德是出世間波羅蜜行功
德應知以於如來如實所說甚深之法正入
功德不顛倒故以彼不能作諸功德障所謂
天魔煩惱魔等不能作障如是次第以能說
法入功德故以深意說不顛倒法功德入故

說法功德以如世諦第一義諦真實說故如
次第說此明何義法自性者所謂諸法自體
相等入彼應知住持功德入法門流位得清
淨法故以依如來住持之力能作所作故是
諸菩薩不共住功德同梵行故以得持戒平
等行故以是菩薩有善法分增長功德以出
世間信等功德皆現前故此是以彼不觸諸
食功德此明何義隨宜而得說依乞食住處
卧具及湯藥等故知足功德聖人所行隨何
資生皆不觸樂離諸欲修行之相不觸功德

對觸應知此復何義不依於他智慧命活是
故易滿易養應知以能隨順證智功德自身
畢竟得阿耨多羅三藐三菩提故以心畢竟
我定得故當知是人為能度者以是人能度
未度者如是等八句為他利益修行功德應
如是知以能安慰煩惱所縛諸眾生等令入
道故能安眾生解脫法中故能令眾生得解
脫故二句次第示現勝處能為說道故能與
解脫故能知對治法故能與所治能治法故
菩薩如是入菩薩位已以為利益一切眾生

心生有故攝諸趣生是故次說菩薩摩訶薩以自在心生於三有是故名爲攝取功德四句示現以自在力攝勝處生雖生彼處而不爲彼之所滌故以長遠時攝取生處不疲倦故以不爲彼煩惱業等他力而生自在如意攝取生故以諸菩薩一切處生不畏彼處所受種種諸苦惱故菩薩如是以爲利益一切衆生修行諸行常爲一切衆生上首是故次說能爲上首能領大衆能辦功德有十五句示現此義菩薩自身如佛所說修行之法勤

而學之教他無過故以長遠時學習禁戒受持不毀守慎堅固故如是則有二種功德於先後時自善住故以是義故能領大衆此義應知以爲衆生能作上首令降伏故以是菩薩能領大衆諸魔不能與作障難遠離一切諸魔業故以有不護身口意業畢竟得故不畏他人說我過故以其現見甚深之法能答問難不怯弱故以說法勝巧方便故以領大衆行於大事修行諸行不退自身善根分故二句示現可化衆生生於明故可化衆生離

無明故與作因緣如是次第此義應知以諸
衆生有隨順者不隨順者而心堅固雖有相
違有不相違諸煩惱等心不異故以於衆生
無差別故爲彼衆生成就一切種種功德能
受一切功德數故以作他恩他人不作報恩
障縛不住心故以爲除滅一切諸使與諸衆
生對治法故以其雖爲大衆圍遶而不高心
故菩薩如自利利他修行諸行以爲成就
佛法修行是故次說爲成就佛法修行功德
二十九句示現此義當知是人如須彌山以

其堅固不可動者以依一切諸勝功德無分
別智餘七地等一切分別不能動故以依彼
法一切聲聞辟支佛念不能破壞以堅固故
以依如來內法修行違佛法者所不能壞以
得勝力故以入第一甚深之義法無我故以
是人得轉身勝法依彼法故得勝解脫滅煩
惱故以依修行轉身得身以一切種諸煩惱
染依身滅故以於一切佛所常聞正法不厭
足故以證實際更無境界未證可證更不求
故以爲衆生演說正法轉法輪故以諸相好

莊嚴其身住持可樂如帝釋王爲諸衆生之所樂故以得八地中十自在力故二句示現於九地中依於樂說辯才說法與諸衆生相應正念如次第說此義應知以於菩薩第十地中得能治法善增長故以得遠離所治障法故所言溺者所對治法說名爲溺以諸菩薩住如是處說名佛地以是菩薩雖有障地而無障故以諸菩薩勝住餘地諸菩薩故以是菩薩無等地住菩薩平等又復無等無差別等復有差別說修多羅等法無我平等一

味證故以諸菩薩住於彼處他不能以覺觀測量故以樂說辯說一切密無滯著故以於無量諸佛如來無量說法而能持能受故以不去而去即次聞慧受大法雨後以如實覺人所覺故以覺彼法隨順正入徹諸法故以入衆生八萬四千諸行門故以如彼行與對治法不疲倦故以諸菩薩雖見世間而離世間故以得失等世間諸法憎愛貪恚諸使煩惱不能增長故以彼菩薩雖有得等大利益事而於修行諸善根分不能滅壞故

菩薩如是修習佛法正修諸行得彼彼勝果是故次說得果功德二十六句示現此義依未解成就依色成就依業成就依菩薩地盡具足成就依入佛地盡成就如是次第此義應知當知是人爲得快愛以諸點慧之所愛者以是菩薩如實證諦是故菩薩爲彼同伴侶者之所恭敬心愛念故以依法句依解法相知彼法重而供養故如次第說以尊重佛法者能供養故以依中間人以依不信佛法人見彼菩薩有大勝事歸依菩薩禮拜等故

以進究竟修菩薩行餘諸菩薩於此菩薩亦供養故餘二乘人雖復進得彼二乘道以是菩薩有勝功德爲彼二乘人求此功德故以是菩薩依彼勝行不求小乘故此是心成就得果功德相當知是人爲不諂曲以無點汗諂曲法者以離有爲世間法相諸諂曲故以其能生世間歡喜去來坐卧諸威儀故以成就妙色形相上下故以威具足爲諸世間生敬重故以身具足三十二相故以彼菩薩八十種妙好一切種種身顯現故此是色成就

得果功德相依佛法僧等住持業成就得果
功德相是人諸佛見者以一切佛皆現見故
即彼佛諸功德故如實見故以得現見如來
法身故以得無量證法受位故以乘中上得
法忍故言乘忍者於七地中言中忍者於八
地九地中言上忍者於第十地中此是菩薩
地盡具足成就得果功德相是人滿足道場
者以證一切種一切功德皆滿足故是人能
降伏衆魔乃至是人能作佛所作事者以降
伏魔如是次第佛作衆生利益應知此是入

佛地盡成就得果功德相不驚等者云何爲
驚以聞深法謂爲異道故名爲驚因彼驚故
轉更增上相續不斷名增上驚驚不斷絕相
應執著名上上驚以墮驚怖中故以在驚怖
故以怖無物故如是次第彼人不驚不增上
驚不上上驚此義應知說彼功德猶不可盡
者依如說修行七種功德種種差別不可數
故佛菩提者如先所說以彼菩提難可知故
難見難覺二句示現以出世間智依世間因
得智境界餘世間智則不能知彼境界故能

信者依取受持讀誦解釋能自隨法如說修行爲令他知故名爲信所謂令他如實修行巧方便智此義應知以彼受持讀誦信等功德不可稱量故以是一切智境界故次依梵天不能盡知彼具足智如經爾時如來告勝思惟大梵天言梵天汝少分知彼諸菩薩摩訶薩色及功德而讚歎之故此明何義以依讚歎以依功德以依於事如是次第依甚深義說謂於義中句中字中甚深應知示現知彼進趣去處知深意故此以何義知深意者

知能說者說法意故示現依量相應法故前後義法相應知以不隨順文字義故以依於義不依字故以依正問依正語故以五種力修行說故是故即說五力言語名爲樂說此義應知此五力者云何名力以有四種力相應故何等爲四一者住持佛所作力二者降伏一切諸外道力三者能知一切魔業知已則能遠離彼力四者三乘畢竟取力於彼法中一一相應以依彼法如來能說善相應故此五力者依五甚深說何等爲五一者依相

甚深二者依意甚深三者依時處甚深四者依進取甚深五者依常說法隨順甚深如是次第依相甚深者一切諸法三世等差別相難覺故過去等法依四種說何等爲四一者依事說二者依對對治說三者依世諦義說四者依進取乘差別說此明何義依事說者謂三世事以說三世事相法故三世事者所謂過去未來現在即此名爲說三世說以依如來無障礙智說三世事名三世說依對對治說者所治煩惱染能治法清淨又彼煩惱

二種差別謂善不善差別又彼善法亦有二種差別謂世間出世間差別世間亦有二種差別謂有漏無漏差別有漏亦有二種差別謂有過無過差別無過亦有二種差別謂有爲無爲差別依世諦義說者依假名名字說我衆生等差別相故依進取乘差別說者得第一義證真如正智依清淨故如次第證如是進取世間涅槃此明何義世間之人所進取者即是世間二乘攝取異地證法以爲涅槃以取寂滅際涅槃故諸菩薩摩訶薩不住

二處故爲彼初力說不執著無過失故說幻等喻此明何義如幻所作象等身體皆不成就如言語所說法義色等身體不成就故如彼夢中夢見受用種種境界而彼夢中種種境界顛倒故見如是言說所說法義受用樂門唯是虛妄分別故有如彼響聲言語說身虛空中聞而無住處如是說法言語音聲第一義中無住善住故猶如彼影現見唯相雖見有色等種種形相彼形相等共彼法體非是相應而依彼法隨順而生如是言說一

切諸法亦唯是相雖有種種名字差別而諸名字共所說法非是相應而依彼法隨順相應如以衆印印於泥等見第二印而諸印體不轉不入而如是見如是言語說於諸法雖因言語聞色等義差別異相而諸言語不在法義而如是聞故如彼陽焰實無有水而亦見水如是言語說於法義無彼所說諸法體相而亦見彼法體相故如彼虛空本來不生本來不滅雖以言語說於虛空而彼虛空無體可說如是言語說於法義第一義諦不可

說故以一切法無彼言語可以說故如是言
說無說一法以言說法如幻等故故以幻等
譬喻示現如是不著言說法義得無障礙智
樂說辯才是名利益此義應知此明何義一
切言語法不離法界說不差別法界說此以
何義一切說法色等差別不離法界說以法
界和合故以說色等諸法差別而不執著故
依意甚深者以依如來六種密意能知如來
有甚深意此義應知何等為六一者念密意
二者無說密意三者對對治密意四者法密

意五者心密意六者字轉密意梵天如我或
染法說淨等此示現念密意此義云何以不
見煩惱染法體故以執著淨法體故以染正
念染淨無體故以不搖動執著此是染法體
相故以心搖動執著此是淨法體相故以彼
染法雖非正念而彼染法不成染法故是名
如來念密意復次梵天我依布施即示涅槃
等此示現無說密意此明何義以佛無起心
而說諸法以一切法無如是力能從此世轉
至彼世我法無體是故無有一法可轉以是

義故無一毫法轉至異世是故依施說得涅槃無有是處是故如來無說密意持戒乃至般若以示現涅槃此明何義此明對對治密意以斷戒等所治之法依波羅蜜樂行行故說持戒等名爲涅槃以斷能起破戒煩惱身口意等不行惡行故以離一切殺害等心依第十三彼害心空空故以不復生忍辱心故以離懈怠常精進爲善增長爲滅惡行無如是心爲善不增惡行不減無如是心故又復更無搖動心故以無覺觀故此以何義以離一切搖

動心故以無分別散亂心故以離一切所見境界是故不生我已得心以無所得而名爲得以不見法故是名如來對對治密意貪欲是實際法性無欲相故乃至愚癡是實際法性無癡相故此示現法密意此明何義離於真如貪等實際等無法可說應知是名如來法密意世間是涅槃無退無生故乃至虛妄是實語爲增上慢人故此示現心密意此明何義以解世間本來不生本來不滅即是涅槃執著涅槃涅槃身體取如是相以此心過

即是世間實言語者依言語說門若見是實
即是虛妄言虛妄者是我慢人虛妄分別以
之爲實取於實相而不實故是名如來心密
意復次梵天如來以隨意故或自說言我是
說常邊者等此示現字轉密意此明何義以
說涅槃等是常法故以說煩惱等諸深法故
以說斷貪等諸使煩惱故以說不作惡行法
故以說不作身等業故以見一切戲論諸邪
見故以一切智不隨他因緣故以證無爲涅槃
法界法故以不依業煩惱一切趣中生以

無生縛故以得畢竟斷愛業故以不住三界
不屬三界故如經而如來無有如此諸事故
此以何義此以如來依常邊等無常等見故
又言無有如此諸事者以一切佛法中無如
是說如是所說不可見故梵天當知是爲如
來隨意以依何意憍慢衆生能捨我慢者此
明何義即於如是所說法中示現異義執著
如名義亦如是故梵天若菩薩知如來隨意
方便說者依離如是名義執著次下復說此
明何義以說法中有二種行一者字行二者

義行此明何義如是名字於義中行如是義於名字中行此是如來甚深之意依此深意如是善知巧方便相字義行智應知此行即名為行菩薩進取如意行故如彼所說甚深之意善巧方便集諸法故則能善知一切所說種種諸法是故菩薩能於諸佛一切說法言語音聲不驚不怖應如是知以諸衆生種種心是故菩薩依彼方便則能信受聞佛出世不出世等以異異相如彼出世不出世等一一示現不執不著以巧方便令彼衆生

信入諸法故以可化衆生身不淳熟令彼衆生身淳熟故爲說麤淺法依樂示樂爲身受樂身淳熟故爲說深法是故次第依時說法此義應知應云何知先爲衆生說麤淺法此明何義攝取因果故攝取彼觀故攝取彼業故以教化方便攝取衆生故十五攝取修行故攝取修行果故布施得大富乃至慧捨諸煩惱者依善法修行攝取因果也以忍爲對對治醜陋以忍能生歡喜心故以忍能作端正因故以聞慧等修行諸行能作智因故以過苦

苦因故以慧如實觀能離諸煩惱以煩惱因散滅不集故又此聞慧行修善法觀何者是觀因以多聞慧為攝取彼觀故攝取彼觀也以修行身等行攝取十善業道依十種業攝取天人中成就諸功德故攝取彼業也無量攝取業憐愍眾生故以教化方便攝取眾生也攝取眾生淳熟方便以依止奢摩他修行一切善法是故奢摩他得毗婆舍那修行故此攝取修行也以依三乘得三乘涅槃故攝取修行果也以攝取乞丐少欲頭陀等為諸

眾生少作利益故不能說法故為令眾生隨順入故如來如是說淺法已然後方乃說深法此明何義說麤淺法明因果事為根不熟可化眾生自心覺知明因果事眾生攝取能作所作我等相見是故如來先明因果次說對對治法能治所治示現自身今離邪見如來實不得我眾生壽命及丈夫等故此義云何有我眾生壽命丈夫義如先說應如是知以不見彼能治所治因果法故略說依隨世間果報以不見施等愛果報故以不見慳等

不愛果報故以得遠離能治所治修行法故
以不見彼離世間果得涅槃果有無法相故
梵天如來常爲衆生說法而諸衆生依如來
教如所說法如實修行勤修諸行爲何義修
行勤行彼行乃至不得涅槃不見涅槃此明
何義如淺說法衆生攝取見諸法相如是修
行出世間果不見彼果如來示現如是說法
是世間因此有何義依佛說法而修行者此
是根本隨順善法修諸行者此是解釋以依
不得法依不見法次第說故不得法者以慧

觀察不能得故不見法者以身不能證涅槃
故爲令衆生攝取妙法者此明何義彼淺說
法及深說法爲令衆生入彼深淺二種法故
以爲示現入法相故此明何義今入法者依
四種入爲可化衆生示現解脫今證彼法此
義應知四種入者相行說得眼等諸根離我
我所體二相空故解彼相已則不能誑得入
解脫故名相入依眼等相能入解脫是故說
爲入解脫相如是彼空相中修正行故得入
解脫相所不誑與誑相違以是義故依修行

入說諸衆生入解脫相是故依此相行二法
示現對治業煩惱染及生等染空等門者此
明何義對治所治見相願染業煩惱染及生
等染對治法故此明何義以空無相無願等
門對治業染及煩惱染以不行門對生死故
對治生染不生不滅門此明何義即彼生染
中間差別對治法故即彼所治復有對治以
無所從來無所至去門復有對治以不退不
去門入解脫相如彼次第自性清淨方靖門
者此明何義以彼法退自性寂靜故示現何

義示現彼染一切寂靜故以何故說自性寂
靜以依性淨說法入故是以次言復次梵天
如來於一切名字示是解脫門如是等此以
何義以有迭共無相應故以自性頑故此明
何義以依異異法說異異名字以諸名字前
字後字不相到故復有差別以言語義不相
到故如是說者爲明何義以說諸法無彼言
語可以說故依無言語名字法相如是說已
示現一切言語名字如來說言名爲解脫因
故此明何義說實諦故彼依如實正說法已

云何得解脫是故次言梵天如來說法無有
法染此明何義為身淳熟淺說法已以為隨
順斷諸煩惱染法等因依入法門故言一切
所說法中示解脫門此示現何義示現涅槃
故此明何義見諦學人餘殘煩惱示現學人
離彼煩惱得解脫故未見實諦者為令彼人
入一切法平等真如方便說法示現涅槃有
二種義應知大悲一者畢竟治彼所治之法
二者謂一切種大悲之心此明何義遠離一
切所治之法及離一切習氣煩惱以得如來

身故以得一切種故略依四種大悲心故何
等為四一者遠離相應大悲之心二者相應
大悲之心三者謂心大悲之心四者修行大
悲之心遠離相應者以識離識不相應故以
見我等心相應故此明何義示現遠離相應
大悲之心示現相應大悲之心如是次第一
切法無我乃至一切法無丈夫依人無我說
一切法無所有依法無我說即彼二種人無
我相法無我相名為無住言無住者以不執
著諸法體等是故不住一切諸法應如是知

此明何義所言住者住諸入故依我見愛門住彼處故夫無住者則無歸處無歸處者云何有歸歸三界故歸六道故以依彼入攝取身故依彼生故以於彼處常沉沒故言沉沒者我我所故以彼彼處生於身故以生我心故有生故無歸處者則無我想無我想者則無我所有歸處者則著我想著我想者則有我著我所者諸法平等既共有之而諸衆生虛妄分別我是增上故此明何義所謂依事攝取執著言依事者依田依宅依園林等

依於父母及妻子等依衣服飲食及卧具等依攝取者攝取一切受用之事依執著者執著以爲自己所有以田宅等我別有故如是著生著於退生言著生者自於此處自異處去以取著故業煩惱染增上滿足來去生染滿時處故依貪瞋癡三種所纏染希十隨所染此義云何貪瞋癡隨所染者以何義故二種名說依根本染謂過去世來至此世從此世中還彼世去以爲上首故如是說如是示現世世生生相續不斷有所有作爲是衆生如是

生不斷絕輪轉彼彼學種種術學種種業文
夫力相作有爲法諸戲論等集得境界受用
境界衆生如是虛妄分別如是一切依俗人
分此義應知又復次有依出家分謂外道等
不見之相邪見相願此明何義言邪見者謂
見我等所言相者虛妄分別彼彼義相所言
願者心常樂求生世間等即此上說遠離悲
心不遠離悲心示現心悲心此義應知爲彼
遠離不遠離故說法修行依於欲求依於有
求依梵行求諸顛倒道爲彼所治能治法故

是以次說修行悲心此明何義依於欲求顛
倒道者以攝取故逮共鬭諍爲諸欲故自於
父母及妻子等共相鬭諍依於瞋恨競訟等
過如是次第依於有求顛倒道者顛倒相應
求梵天等常見顛倒顛倒取故故言顛倒爲
顛倒者離顛倒道令得入於非顛倒道又依
有求顛倒道者住於異道爲教化彼異道衆
生今入佛道不可得故依梵行求顛倒道者
略有三種所謂不求邪求下求此復何義一
切世間不自在過及邪命過作親相過諸煩

惱染業苦染法俗人樂家是故衆生不求梵
行不求梵行者不求解脫故此所謂慳及慳
押沒行慳行貪行誑行懈怠習氣如是次第
一一拔濟不知厭足奪他財物者以自資生
非法求故施等不足衆生當財物屋宅妻子
恩愛而作僮僕者示現彼心不在故於此危
脆無堅之物生堅固想者以於彼無常資生
等中生常想故供養恭敬者此爲何義爲飲
食所縛不成就故衆生雖謂是善知識而是
衆生惡知識者示現怨家故邪命自活者以

斛秤等欺誑他故一切行中勤修諸行則能
畢竟得大菩提而彼衆生懈怠疲倦故聖人
最勝解脫處者非顛倒因修行者得而諸衆
生求邪梵行依顛倒因而修諸行所望得者
是人乃求外道解脫爲今不行彼邪道故何
以故以彼不得聖人解脫故衆生棄捨最上
大乘無礙等者以彼求於下梵行故捨於無
上第一大乘而求下分小乘法故

勝思惟梵天所問經論卷下

永樂北藏

勝思惟梵天所問經論

第一〇二冊

音釋

黠

胡八切
慧也

溺

女力切

遞

大計切
更迭也